

PENYATA RASMI PARLIMEN

Parliamentary Debates

KAMAR KHAS

Special Chamber

PARLIMEN KEEMPAT BELAS
PENGGAL KEEMPAT
MESYUARAT PERTAMA

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- Kementerian Dalam Negeri Harus Tarik Balik Rayuan ke atas Keputusan Mahkamah Tinggi Mengenai Kewarganegaraan di bawah Perkara 15(2) Perlembagaan Persekutuan
 - YB. Tuan Charles Anthony Santiago (Klang)

(Halaman 1)

- Masalah Loji Kumbahan, Atap Bumbung, Sistem Perwayaran dan Lampu Jalan
 - YB. Tuan Steven Choong Shiau Yoon (Tebrau) (Halaman 4)

MALAYSIA KAMAR KHAS PARLIMEN KEEMPAT BELAS PENGGAL KEEMPAT MESYUARAT PERTAMA

Selasa, 28 September 2021 Mesyuarat dimulakan pada pukul 2.30 petang

DOA

[Timbalan Yang di-Pertua (Dato' Mohd Rashid Hasnon) mempengerusikan

Mesyuarat]

UCAPAN DI BAWAH USUL BERKENAAN PERKARA TADBIR KERAJAAN (P.M. 17)

Kementerian Dalam Negeri Harus Tarik Balik Rayuan ke atas Keputusan Mahkamah Tinggi Mengenai Kewarganegaraan di bawah Perkara 15(2) Perlembagaan Persekutuan

2.34 ptg.

Tuan Charles Anthony Santiago [Klang]: Tuan Yang di-Pertua, Yang Berhormat Menteri. Wanita Malaysia harus bergantung pada permohonan taraf kewarganegaraan di bawah Perkara 15(2) Perlembagaan Persekutuan untuk mewarisi kewarganegaraan kepada anak-anak mereka yang dilahirkan di luar negara.

Proses ini penuh dengan kelewatan, ketidakkonsistenan, penolakan berulang tanpa alasan dan tiada ketentuan atau jaminan kukuh bagi mendapat kewarganegaraan Malaysia. Keputusan Mahkamah Tinggi membenarkan kewarganegaraan automatik diberikan kepada kanak-kanak dilahirkan di luar negara oleh ibu warganegara Malaysia yang berkahwin dengan warga asing. Namun, Kerajaan Persekutuan pula membuat rayuan ke atas keputusan tersebut dan terus mendiskriminasikan golongan wanita.

Ini menyebabkan masa depan anak-anak mereka berada dalam keadaan yang tidak menentu dan tidak mempunyai peluang yang sama rata untuk mengakses kepada pendidikan, kesihatan awam dan peluang ekonomi walaupun mereka tinggal di Malaysia. Saya memohon kerjasama Yang Berhormat Menteri untuk menjawab soalan-soalan berikut:

(i) undang-undang kewarganegaraan yang bersifat diskriminasi gender memberi impak negatif yang serius. Keputusan

Mahkamah Tinggi telah menegakkan keadilan untuk mangsa undang-undang tersebut di mana hak asasi mereka telah lama dipinggirkan. Apakah faktor-faktor utama kerajaan enggan mematuhi keputusan tersebut?;

- (ii) golongan wanita terpaksa merisikokan nyawa mereka dan bayi dalam kandungan untuk menaiki kapal terbang dan balik ke Malaysia bagi mendapatkan kewarganegaraan bayi tersebut. Perdana Menteri telah menekankan konsep 'Keluarga Malaysia' dalam pentadbiran baharu beliau. Oleh itu, mengapakah kerajaan tidak melaksanakan tanggungjawabnya untuk melindungi golongan wanita ini?;
- (iii) alasan kerajaan untuk membuat rayuan keputusan Mahkamah Tinggi ialah untuk mengelakkan pewarisan 'double citizenship' oleh rakyat Malaysia. Akan tetapi, anakanak kepada lelaki Malaysia yang berkahwin dengan warganegara asing di mana anak-anak dilahirkan di luar negara juga berkemungkinan memiliki dua atau tiga kewarganegaraan. Apakah ini tidak mendiskriminasikan golongan wanita Malaysia dalam pemberian kewarganegaraan kepada anak-anak mereka?;
- (iv) berdasarkan Penyata Rasmi, kadar kelulusan permohonan di bawah Perkara 15(2) Perlembagaan Persekutuan Malaysia adalah lebih kurang dua peratus. Apakah sebab kadar kelulusan yang rendah sebegini dan mengapakah permohonan-permohonan tersebut ditolak?; dan
- (v) apakah cara penyelesaian bagi mempermudah proses permohonan anak-anak yang dilahirkan oleh wanita Malaysia di luar negara yang kini berumur 21 tahun dan tinggal di Malaysia? Hal ini kerana, mereka tidak dibenarkan untuk memiliki kediaman yang tetap, tetapi hanya diberikan status sebagai pelancong dan terpaksa berpisah dengan keluarga mereka.

Sekian terima kasih di atas kerjasama pihak Tuan Yang di-Pertua dan Yang Berhormat Menteri. Terima kasih.

2.38 ptg.

Timbalan Menteri Dalam Negeri I [Dato' Sri Dr. Haji Ismail bin Haji Mohamed Said]: Terima kasih, Tuan Yang di-Pertua. Terima kasih, Yang Berhormat sahabat saya. Tuan Yang di-Pertua, kementerian menghormati keputusan Mahkamah Tinggi Kuala Lumpur pada 9 September 2021 yang dibuat berhubung dengan kes Suriani Kempe bersama enam lagi melawan Kerajaan Malaysia mengenai isu pentafsiran perkataan 'Bapa' dalam Jadual Kedua, Bahagian II, seksyen 1(b) dan 1(c) Perlembagaan Persekutuan iaitu Perkara 14(1)(b) bahawa perkataan 'Bapa' hendaklah ditafsirkan sebagai termasuk ibu dan keadaan ini membenarkan anak kepada ibu warga Malaysia yang berkahwin dengan warga asing dan dilahirkan di luar negara berhak mendapat kewarganegaraan melalui kuat kuasa undang-undang.

Walau bagaimanapun, terdapat satu lagi keputusan penghakiman yang berbeza dalam isu ini iaitu bagi kes Mahisha Suhaila Abdul Majeed melawan Ketua Pengarah Pendaftaran Negara dan dua lagi yang diputuskan oleh Mahkamah Tinggi pada 21 Mei 2020 yang menyebelahi kerajaan dan rayuan telah dibuat oleh pihak Mahisha Suhaila Abdul Majeed kepada Mahkamah Rayuan dan kes tersebut akan dibicarakan pada bulan November 2021.

Setelah mengambil kira keputusan penghakiman yang berbeza dalam isu pentafsiran ini, Kementerian Dalam Negeri bercadang untuk memperhalus perkara ini bagi mendapat dasar baharu kerajaan sama ada untuk meminda Perlembagaan Persekutuan bagi memudahkan ibu warga Malaysia yang melahirkan anak mereka di luar negara selepas berkahwin dengan lelaki warga asing untuk mendapatkan kewarganegaraan anak mereka melalui kuat kuasa undang-undang. Selain itu, sebarang pindaan ke atas Perlembagaan Persekutuan khususnya berhubung perkara kewarganegaraan ini perlulah terlebih dahulu mendapat persetujuan Majlis Raja-Raja selaras dengan Perkara 159(5) Perlembagaan Persekutuan.

Oleh yang demikian, Kementerian Dalam Negeri mengambil keputusan untuk memfailkan notis rayuan pada 13 September 2021 dan memohon *stay of execution* (iaitu penangguhan pelaksanaan) keputusan Mahkamah Tinggi Kuala Lumpur Suriani Kempe bersama enam lagi melawan Kerajaan Malaysia bagi mengelakkan *contempt of court* dan pada masa yang sama supaya ia tidak bercanggah dengan Perlembagaan Persekutuan. Isu berhubung kewarganegaraan ini juga telah dibincangkan di dalam Mesyuarat Jemaah Menteri pada 24 September 2021 dan pihak Jemaah Menteri telah meminta supaya Peguam Negara membawa perkara berkaitan isu kewarganegaraan ini kepada Duli Yang Maha Mulia Timbalan Yang di-Pertuan Agong dalam waktu yang terdekat.

Untuk makluman Ahli Yang Berhormat, mengikut Perlembagaan Persekutuan, pemerolehan kewarganegaraan Malaysia bagi individu berumur di bawah 21 tahun yang dilahirkan di luar negara oleh ibu bertaraf warganegara Malaysia yang berkahwin dengan bapa bertaraf bukan warganegara adalah secara pendaftaran di bawah Perkara 15(2) tertakluk kepada pematuhan syarat dalam Bahagian III Perlembagaan Persekutuan, Kaedah-kaedah Kewarganegaraan 1964 serta perundangan berkaitan yang berkuat kuasa dalam isu pendaftaran perkahwinan, kesahtarafan serta peraturan imigresen. Dalam hal ini, setiap pertimbangan permohonan kewarganegaraan di bawah Perkara 15(2) Perlembagaan Persekutuan turut mengambil kira dasar kerajaan yang amat tegas tidak mengiktiraf pemilikan dwi-kewarganegaraan.

Bermula pada tahun 2010, bagi memudahkan urusan permohonan kewarganegaraan di bawah Perkara 15(2) Perlembagaan Persekutuan, permohonan boleh di buat di mana-mana pejabat perwakilan Malaysia di luar negara bagi kanak-kanak yang berumur tidak melebihi satu tahun ketika permohonan dibuat.

Setiap permohonan kewarganegaraan akan diteliti secara *case-by-case* tertakluk kepada fakta dan dokumen sokongan yang dikemukakan serta ia diproses mengikut giliran yang sewajarnya sebelum keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan dan fakta kes. Kementerian sedang melaksanakan tindakan segera secara berperingkat terhadap semua permohonan kewarganegaraan yang diterima dan sentiasa berusaha untuk memudah cara permohonan berkenaan selagi ia selaras dengan perundangan yang berkuat kuasa.

Terima kasih, Tuan Yang di-Pertua. Terima kasih Yang Berhormat.

Masalah Loji Kumbahan, Atap Bumbung, Sistem Perwayaran dan Lampu Jalan

2.43 ptg.

Tuan Steven Choong Shiau Yoon [Tebrau]: Tuan Yang di-Pertua, Yang Berhormat Menteri Kementerian Perumahan dan Kerajaan Tempatan, saya ingin menyampaikan masalah-masalah yang dihadapi para penghuni di rumah PPR, Desa Mutiara, Johor Bahru.

PPR Taman Desa Mutiara mempunyai 22 blok dengan lebih kurang 2,000 orang penyewa yang terdiri daripada mereka yang dikategorikan golongan miskin. Dengan penduduk yang banyak, nescaya akan membawa kepada 'wear and tear' dan isu besar di PPR ini adalah kerosakan fizikal dan penyelenggaraan seperti kerosakan bumbung dan sistem saliran kumbahan.

Beberapa isu yang timbul sehingga hari ini adalah:

(i) bumbung atap di tingkat 5 di beberapa blok boleh dikatakan dalam keadaan merbahaya dan perlu diganti secepat mungkin;

- (ii) selepas diteliti bumbung atap, didapati juga sistem perwayaran adalah dalam keadaan yang sangat bahaya. Ada masanya penduduk pegang pada tingkap besi atau tangga ada rasa arus elektrik bila disentuh:
- (iii) pemegang tangga besi kebanyakan telah rosak atau hilang perlu digantikan agar penduduk di tingkat 1 hingga tingkat 4 tidak selamat naik ke rumah mereka; dan
- (iv) sistem saliran kumbahan telah rosak, khususnya di banyak blok di mana salurannya banyak yang pecah dan menghalang pengaliran air kumbahan dari blok ke loji kumbahan. Keadaan ini mengakibatkan penghuni blok bawah dikehendaki buat sendiri untuk menjolok saluran agar air kumbahan yang dihalang untuk mengalir balik ke bilik air mereka. Lebih-lebih lagi air kumbahan melimpah dan bertakung di tepi kelas tadika di Blok 17.

Walaupun mantan Yang Berhormat Menteri KPKT telah datang ke Desa Mutiara beberapa kali untuk mendengar aduan penduduk situ, namun isu-isu atas masih belum diatasi. Oleh yang demikian, saya memohon sekiranya dapat jasa baik Yang Berhormat Menteri menyalurkan peruntukan yang mencukupi agar usaha-usaha baik pulih dapat dilaksanakan agar situasi asal rumah PPR Desa Mutiara dapat dikekalkan. Semoga permohonan rakyat Tebrau dapat dipertimbangkan Yang Berhormat. Sekian, terima kasih.

2.46 ptg.

Timbalan Menteri Perumahan dan Kerajaan Tempatan [Dato' Sri Dr. Haji Ismail bin Abd Muttalib]: Bismillahi Rahmani Rahim. Assalamualaikum warahmatullaahi wabarakaatuh dan salam sejahtera. Terima kasih Tuan Yang di-Pertua. Terima kasih Yang Berhormat Tebrau.

Tuan Yang di-Pertua, untuk makluman Ahli Yang Berhormat, Program Penyelenggaraan Perumahan (PPP) adalah inisiatif Kerajaan Persekutuan bagi membaik pulih dan penyelenggaraan harta bersama perumahan berstrata kos rendah dan kos sederhana rendah awam. Manakala, Tabung Penyelenggaraan Perumahan Malaysia (TPPM) pula merupakan inisiatif membaik pulih dan penyelenggaraan harta bersama bagi perumahan berstrata kos rendah dan kos sederhana rendah swasta.

Dari tahun 2016 hingga tahun 2020, Kementerian Perumahan dan Kerajaan Tempatan (KPKT) secara keseluruhannya telah meluluskan sebanyak 1,194 Projek PPP dan TPPM di seluruh negara dengan peruntukan berjumlah sebanyak RM620.11 juta.

Bagi negeri Johor, dari tahun 2016 hingga tahun 2020, KPKT telah meluluskan sebanyak 217 permohonan PPP dan TPPM dengan peruntukan berjumlah RM106.87 juta seperti pecahan berikut:

	Program		Bilangan Projek	Kos (RM)
Program (PPP)	Penyelenggaraan	Perumahan	15	20.25 juta
Tabung	Penyelenggaraan	Perumahan	202	86.62 juta
Malaysia (TPPM)				
Jumlah			217	RM106.87 juta

Pada tahun 2020 sebanyak RM5.58 juta dibelanjakan di negeri Johor untuk pembaikan dan penyelenggaraan di bawah projek PPP, manakala sebanyak RM2.9 juta dibelanjakan untuk PPR Desa Mutiara sahaja.

Bagi tahun 2021, KPKT telah meluluskan 28 permohonan dengan peruntukan RM7.55 juta bagi projek PPP di negeri Johor. Daripada jumlah tersebut, KPKT telah meluluskan 14 permohonan penyelenggaraan PPR Desa Mutiara, Tebrau dengan kos sebanyak RM3.35 juta untuk dilaksanakan oleh pihak Setiausaha Kerajaan (SUK) Negeri Johor.

Untuk makluman Yang Berhormat juga, PPR Desa Mutiara, Tebrau telah siap dibina pada tahun 2006 dan merangkumi 2,000 unit rumah seperti yang disebutkan oleh Yang Berhormat. Dari tahun 2016 sehingga tahun 2021, KPKT telah menerima 40 permohonan bagi menangani isu kerosakan di PPR berkenaan iaitu:

- (i) bumbung atap;
- (ii) sistem perwayaran;
- (iii) pemegang tangga besi; dan
- (iv) kerosakan saliran kumbahan.

Pada masa sekarang, projek PPP yang sedang dilaksanakan di PPR Desa Mutiara, Tebrau adalah seperti berikut:

- (i) satu projek kerja membaiki, mengganti sistem paip sanitari dan kumbahan dengan kos RM500,000 di tujuh blok iaitu Blok 1,7,16,17,18,20 dan 22;
- (ii) tiga projek membaiki atau mengganti tangga dan *handrail* di semua tingkat dengan kos RM850,000 di Blok 4,5,6,7,8,9,11,12,17,20 dan Blok 21; dan

(iii) sepuluh projek membaiki atau mengganti bumbung dengan kos RM2 juta di Blok 1,2,3,4,5,6,10,11,12 dan Blok 15. 14 projek keseluruhannya.

Status terkini pelaksanaan PPP berkenaan adalah seperti berikut:

Bil	Butiran Projek	Status
		Pelaksanaan (Peratus)
1.	Kerja Membaiki/ Mengganti Sistem Paip	75
	Sanitari dan Kumbahan di PPR Desa	
	Mutiara, Johor Bharu Blok 1,7,16,17,18,20 dan 22	
2.	Membaiki atau Mengganti Tangga dan	25
	Handrail di PPR Desa Mutiara, Johor Bharu Blok 4,5,6 &7	
3.	Membaiki atau Mengganti Tangga dan	25
	Handrail di PPR Desa Mutiara, Johor Bharu Blok 8,9,11 &12	
4.	Membaiki atau Mengganti Tangga dan	25
	Handrail di PPR Desa Mutiara, Johor Bharu Blok 17,20 & 21	
5.	Membaiki atau Mengganti Bumbung di PPR	25
	Desa Mutiara, Johor Bahru Blok 1	
6.	Membaiki atau Mengganti Bumbung di PPR	Dalam
	Desa Mutiara, Johor Bharu Blok 2	penilaian
7.	Membaiki atau Mengganti Bumbung di PPR	Dalam
	Desa Mutiara, Johor Bharu Blok 3	penilaian
8.	Membaiki atau Mengganti Bumbung di PPR	Dalam
	Desa Mutiara, Johor Bharu Blok 4	penilaian
9.	Membaiki atau Mengganti Bumbung di PPR	25
40	Desa Mutiara, Johor Bharu Blok 5	0.5
10.	Membaiki atau Mengganti Bumbung di PPR Desa Mutiara, Johor Bharu Blok 6	25
11.	Membaiki atau Mengganti Bumbung di PPR	Dalam
	Desa Mutiara, Johor Bharu Blok 10	penilaian
12.	Membaiki atau Mengganti Bumbung di PPR	25
12.	Desa Mutiara, Johor Bharu Blok 11	20
13.	Membaiki atau Mengganti Bumbung di PPR	25
	Desa Mutiara, Johor Bharu Blok 12	
14.	Membaiki atau Mengganti Bumbung di PPR	25
	Desa Mutiara, Johor Bharu Blok 15	

Untuk makluman Ahli Yang Berhormat, oleh sebab kos pembaikan dan penyelenggaraan semakin meningkat, KPKT akan melihat keperluan sama ada projek PPR ini boleh dibangunkan semula. Walau bagaimanapun, ini memerlukan kerjasama dan perbincangan lanjut bersama dengan pihak kerajaan negeri dan penduduk setempat.

Pada masa ini PPR Desa Mutiara diberikan pengecualian bayaran sewa rumah oleh kerajaan negeri. Justeru, kami, KPKT meminta supaya penduduk hendaklah memberi kerjasama untuk menjaga PPR ini seperti rumah sendiri agar dapat mengurangkan kerosakan dan peruntukan kewangan yang disalurkan bagi membaiki kerosakan-kerosakan ini dapat digunakan semula untuk keperluan penduduk setempat. Terima kasih, Tuan Yang di-Pertua.

Timbalan Yang di-Pertua [Dato' Mohd Rashid Hasnon]: Terima kasih, Yang Berhormat Timbalan Menteri. Sekiranya ada maklumat tambahan, boleh diberikan kepada Yang Berhormat Tebrau. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Rabu, 29 September 2021. Terima kasih Ahli-ahli Yang Berhormat.

[Kamar Khas ditangguhkan pada pukul 2.53 petang]